

耐菴文存

耐菴文存卷二

善化賀長齡耦庚著

序

貴州丁酉科武闈鄉試錄序

道光十有七年丁酉歲屆賓興文闈既竣例舉武試

循例謹調貴州定廣副將

臣

汪鳳臨來省監射進學政

臣賈克慎冊送十六府廳州縣武生五百九十五名率

同提調官糧儲道

臣

任樹森監試官八寨同知

臣

李秀

發按日簡閱合馬步射弓刀石中數斤數分別雙單好字號及內場默寫五經三試而洩擇之得材技尤異者

耐菴文存

卷二

序

十一

二十三人中式如額敬刊題名錄恭呈

御覽臣例得賜言簡端臣惟古者寓兵於農故州縣鄉遂之大夫卽伍兩卒旅之將帥民旣無兵之擾揆文奮武官亦莫相凌競沿及兩漢猶存此意至唐而遂分矣歷宋元明無代不以養兵爲患躬秣餉者輕文吏爲無用服簪組者薄武弁爲粗官合則兩美分則兩害其勢然也

國家定制武生隸籍學官其獲雋也必釋奠於泮宮其教之射也比禮比樂於是觀德焉卽位躋專闡必轄於總督巡撫則文武雖分猶然同條而其貫也我

朝騎射爲本

列聖武功超越前代

皇上智勇天錫

表正萬邦

臨軒校射歲月無間

詔旨屢下飭勵內外武闈典試各官必以弓力强弱分別去取豈不以折衝禦侮端藉虎臣而志正體直則鷹揚之中仍不失鵠峙之意黔雖邊徼而習勞耐苦風氣剛勁挽強破的頗不乏人臣所取士十四力者二十人十二力者三人材武亦云盛矣諸士旣荷

國恩此身已非已有

昇平全盛之時亦無資於敵愾然而有備無患則安攘綏定之略曷可不豫講而素蓄之臣願諸士淡惟

朝廷文武並用儲將衛民之意退則循分奉法無爲鄉里患苦進則建威樹勳使文臣樂得武臣之助而民不知兵且重賴有兵有兩美而無兩害是則臣區區之愚

所藉以自獻也夫維時官斯土者則雲貴總督兵部尙書兼都察院右都御史臣伊里布貴州承宣布政使司

布政使臣慶祿貴州提刑按察使司按察使臣唐鑑貴

西兵備道臣周廷授貴東兵備道臣文明貴州提督臣

祝廷彪鎮守安義等處地方總兵官臣阿精阿鎮守古

州等處地方總兵官臣范樹桐護理鎮遠等處地方總

兵官清江協副將臣福克精額鎮守威甯等處地方總

兵官臣松青例得備書

兵部侍郎兼都察院右副都御史巡撫貴州等處地方

提督軍務加節制通省兵馬銜兼理糧餉臣賀長齡謹

序

貴州己亥科武闈鄉試錄序

道光十有九年己亥預行正科文闈既竣接試武場

臣

循例謹調貴州定遠副將

臣

汪鳳臨來省監射進學政

臣王慶雲冊送十六府廳州縣武生四百九十九名率

同提調官糧儲道

臣

任樹森監試官古州同知

臣

張鏌

按日簡閱合馬步射弓刀石中數斤數分別雙單好字
號及內場默寫武經三試而浚擇之得材技尤異者二
十三人中式如額敬刊題名錄恭呈

御覽

臣

例得鵬言簡端

臣

惟兵農既分之後文武遂判

兩途民出財以贍兵而忘其勞兵出力以衛民而忘其

灰蓋千數百年於此矣。然自唐以來，民財國帑半耗於兵。偶值水旱調緩，度支恆虞不給，而卒莫敢惜此大費者，豈非以固圉保民，干城攸寄，雖所費不貲而所全實大。然則躬靺鞨者，顧可以粗官自輕而不思所以仰副朝廷倚毗之至意哉？乃者仁懷小醜至，動干戈，幸仗聖主天威，諸將士咸知用命，得以立奏蕩平而已。不免勞費，則詰奸禁暴，所以弭患未萌者，臣實有深愧焉。而亟思有以善其後也。黔兵夙稱勁健，今臣所取不乏，挽強命中之才，既有勇矣，而又能知方，則敵愾禦侮，但須一鼓作氣耳。諸士特患不奮，不患不能也。而臣之患尤

有進於此者幸際

昇平之世兵可百年不用不可一日無備臣願諸士預講而素蓄之異時爲

國馳驅卽一亭一障之寄亦必圖所以建威銷萌於無事之日使一方隱然恃若長城則曲突徙薪之爲功其視焦頭爛額者蓋相萬也諸士其淡念之哉維時官斯

土者則雲貴總督兵部尙書兼都察院右都御史臣伊

里布兼署貴州承宣布政使事按察使臣李象鵬貴西

兵備道臣周廷授兼護貴東兵備道署貴陽府知府臣

張志訕貴州提督臣張國相鎮守安義等處地方總兵

官臣阿精阿鎮守古州等處地方總兵官臣玉明鎮守

鎮遠等處地方總兵官臣榮玉材鎮守威甯等處地方

總兵官臣松青例得備書

兵部侍郎兼都察院右副都御史巡撫貴州等處地方
提督軍務加節制通省兵馬銜兼理糧餉臣賀長齡謹
序

貴州庚子 恩科武闈鄉試錄序

道光二十有一年恭值

皇上六旬萬壽先期

詔開慶榜爰於十九年預行庚子鄉試正科二十年接
舉

恩科文闈既竣武場旋屆臣循例謹調貴州都勻副將

臣淳慶來省監射進學政臣王慶雲冊送十六府廳州

縣武生五百一十名率同提調官貴陽府知府臣鄧應

台監試官揀發委用同知臣周作楫按日簡閱合馬步

射弓刀石中數斤數分別雙單好字號及內場默寫武

而者
經三試而洩擇之得材技尤異者二十三人取中如額
敬刊題名錄恭呈

御覽

臣

例得颺言簡端

臣

惟今屆之距前科僅一寒暑

耳今之所取大半皆前之所遺卽其聲音面貌與夫技藝短長臣猶能約略識之新出蓋無幾耳母乃所產不足以供所求而有濫竽充數之慮乎而不然也夫人才固接時而生而精采以磨練而出我

朝以神武定天下二百年來士生其間上追方召次齊韓白者鱗接翼比後先相望也我

皇上御極二十年

臨軒校射月無虛日所以激厲而成就之者雖在萬里之外罔弗砥淬奮興而黔尤號勁兵處趨捷壯健爲天下最欣逢

壽考作人貞元會合之盛川嶽之所鍾孕與

國家之所教養一氣感孚英傑輩出卽連歲取之方日新而未有已也且前之遺者非遂遺之也有才之將成而礪厲之以致厥精者矣有才之旣成而宿留之以大其用者矣惟不才而頽廢者斯無望耳至其克自樹立則靡不蒸蒸焉日進於上以仰副

朝廷激揚之意而臣亦得所藉手稍酬夙昔以人事

君之本懷然則前之遺者正爲今之取者地也而何不
足供之有雖然臣猶願爲多士勛也夫前之遺而今取
之則今之所遺又卽將來之所取也驛驪已導乎先路
而騏驥爭奮於後塵多士其可不勉乎卽今日之與是
選者雖巧力足稱而於御眾詰戎運籌淩勝之方蓋猶
未之習也聞鼓鼙而思將帥臣且爲旣雋者加勛焉矧
其在未雋者哉指顧三年多士其磨厲以待維時管斯
土者則雲貴總督兵部尙書兼都察院右都御史臣桂
夏兼署貴州承宣布政使事糧儲道臣任樹森貴州提
刑按察使臣文綸護理貴西兵備道事都勻府知府臣

張志詠貴東兵備道臣陸元煥貴州提督臣張國相鎮
守安義等處地方總兵官臣段永福署理古州等處地
方總兵官大定協副將臣貴保鎮守鎮遠等處地方總
兵官臣榮玉材鎮守威甯等處地方總兵官臣松青例
得備書

兵部侍郎兼都察院右副都御史巡撫貴州等處地方
提督軍務加節制通省兵馬銜兼理糧餉臣賀長齡謹
序

貴州癸卯科武闈鄉試錄序

道光二十有三年癸卯賓興屆期文闈既竣接舉武試
臣循例謹調貴州平遠副將臣孫淇洪來省監射進學
政臣鍾裕冊送十六府廳州縣武生六百三十名武監
生四十二名共六百七十二名率同提調官銅仁府知
府臣馬映辰監試官委用知府臣仇效忠按日簡閱合
馬步射弓刀石中數斤數分別雙單好字號及內場默
寫武經三試而洩擇之得材技尤異者二十三人中式
如額敬刊題名錄恭呈

御覽臣

例得颺言簡端臣

觀周南所稱赳赳武夫卽置

而者亦不
兔鄙賤之人亦足備干城之選未嘗不歎盛世之人材
何其眾也臣代匱黔撫四典武闡應試之士近且多至
六百七十餘人實較往歲爲尤盛就中以新例獲雋者
蓋二人焉可見人材不擇類而生矧逢我
皇上整飭戎行

躬親校射所以激厲而裁成之者凡在大化之中孰不
爭自矜奮茲又

詔開新例俾得寬其途以自效仰見

大聖人拊髀思將之意延攬及於無窮而多士亦遂乘
時競起如響斯應蓋風雲會合之機如是其不爽也顧

臣紬繹詩詞其言干城謂其強毅可資捍衛也是亦足稱武選矣而詩又曰公侯好仇且申之曰公侯腹心若不僅恃一勇以爲禦侮之備者漢儒鄭康成箋云好仇者敵國有來侵伐可使和好之也腹心者言可用爲策謀之臣使之慮無也然則制勝之方剛柔互用機宜之妙變化無方古稱孫武精兵機陸遜識兵勢勢猶顯而易見機則伏於無形非夫參伍以練識沈深以運智一旦猝遇事變呼吸安危其孰能免於暴虎馮河之譏而持重養威以善其後也哉多士材武誠有可觀然猶未試之於事也卽試之而效矣亦不過偏裨伎倆耳至於

專闢建牙獨當一面指麾所及億萬生靈係之此豈氣
矜之隆所能辦多士其謚講肄韜鈴揆時審勢以謀濟
勇能屈能伸則庶幾乎詩人所云而於

朝廷博求廣攬之盛心爲不負矣多士勛哉維時官斯

土者則雲貴總督兵部尙書兼都察院右都御史

臣桂

良貴州承宣布政使司布政使

臣

李象鵬署貴州提刑

按察使事貴東道

臣

陸元烺貴州通省清軍糧儲兵備

道

臣

馮德馨貴西兵備道

臣

鄭世任護貴東兵備道事

興義府知府

臣

朱艘貴州提督

臣

張國相鎮守安義等

處地方總兵官

臣

秦鍾英鎮守古州等處地方總兵官

臣崇福鎮守鎮遠等處地方總兵官臣榮玉材鎮守威甯等處地方總兵官臣善祥例得備書

兵部侍郎兼都察院右副都御史巡撫貴州等處地方提督軍務加節制通省兵馬銜兼理糧餉臣賀長齡謹序

遵義府志序

今之府州志卽周官小史所掌邦國之志也。後鄭稱如周志鄭書之屬者皆亾矣。自班氏始著地理志而志特史中之一地理又志中之一目。江文通云作史莫難於志。余謂志府州則尤難。蓋史志取一朝掌故事具大指卽稱完善。府州志雖一地理而天文五行食貨職官藝文及紀表列傳靡不較史加詳則志也而全史矣。分門別部上下數千年使相貫屬則志也且通史矣。又史志取材者一朝之實錄起居注會典檔案紛羅於前僅待裁翦府州志則零搜碎採事事鉤稽訪古或故老無聞

撫今或譜狀難恃潛光隱德歷久愈湮金石遺文在遠
日晦甚卽六曹陳牘非滅裂於胥吏或灰蕩於水火文
獻不足作者慨諸至志邇遠之府州則尤難之難者欲
雅則古籍無徵欲贍則名流鮮及偶有劄錄率是俗簿
而一二賢牧守思文澤吏治輒以無足論述置之置之
旣久則卽其時可言者亦且墜失無傳以故陋益陋缺
益缺此志之大較也遵義之有志創於前明孫太守敏
政後平播僅十年書雖不及稽古而事詳見在簡核可
觀今無傳本僅有舊鈔前半弄在民間
國朝康熙二十四年遵義令陳君瑄奉

詔天下各修府州縣志以備一統志採擇迫於奏部三月纂成其書率盡鈔孫志略爲增減明末

國初數十年紛紛兵燹爭據在當時能考者概略不道令後人無自求詳實深可惜此志之後至今日一百六十年無紀載矣其舊間之放失爲何如邪道光戊戌冬山陰平太守翰始議重加纂輯繼順德黃給事樂之來作守因踵之焉前後閱三載書乃勒成而是役實余門人鄭生珍屬彙莫孝廉友芝佐焉鄭生嘗以採著顛末告余曰議之始蓋茫然無刺手處畱心一年乃始知有孫志陳志及各州縣草志而蒐得之又一年乃悉發荒

碑什碣及各家所遺舊記事狀知不可復有得乃始具
橐橐蓋數月間事巨噫志邇遠府州之難有如是哉是
志也於黔中足謂雅贍巨矣昔竇德元不能對帝邱之
問到今談者陋之今郡人有是書其可以不德元乎然
而余復有說凡一府數百里中風化之盛衰民心之醇
醜政教之得失美惡一一皆本乎長吏如遵義者可不
謂貴州之大郡也乎經我

國家

聖聖相承休養理極故其郡閭閻之殷賑物力之豐阜
風土人文之秀澤一切與中州等富庶之國誠曰易治

而自昔沃土往往不材守令者承流宣化又可漫無維
繫也乎然則按疆域當思何以撫綏稽戶口當思何以
保聚詢風俗當思何以補救奉祠廟當思何以致祥農
桑思何以勸課學校思何以振興與夫城池津梁及榷
賦倉儲諸大政思何以利民而盡職如是則夙夜勤勤
業業日求無負

聖天子委畀一方至意庶此志非區區空言乎余願與
諸君子共勸之道光二十有一年歲在辛丑仲秋月撫
黔使者賀長齡序

思南府續志序

道光庚子夏森圃前輩倡修思南郡志惜未載其事周小湖侍御權守是邦踵而成之以書問序於余余閱其書凡星野疆域廟壇學校武備鄉賢列女之實歷歷如在目前噫此書廢將百六十年得賢太守相繼而表章之厥功偉矣夫正俗調風徵文訪獻使人有所觀感而相化於善類非俗吏之所能爲也熙熙然飲德江之水力聖嶺之耕服習乎爲仁之堂游息乎中和之亭相與續前修而振後起又都人士之所宜自愛而未可量焉者也余聞是邦多君子有若李同野則以正學倡西南

矣有若申天錫則以忠孝稱完人矣有若田西麓蕭劍
斗則以經濟奏議克自樹立矣有若田子禮李畱坡則
以宣慰義憤不負所司矣其他秉禮而慕義守貞而抱
信佩恥而砥廉其事皆自爲之事而百世下流連慨慕
咨嗟敬畏不惟賢士大夫如出一轍下逮愚婦悍卒僕
隸乞人聆其風流遺韻亦莫不肅然惻然於乍聞之際
者何哉民彝如昨而是非之公不能混淆也若夫襟帶
川蜀控扼黔楚思南雖山國實黔東北保障爲民牧者
尤當仰體

聖天子誠和休養之至意俾無輕去其鄉無重視其利

無逞小忿而搆獄訟無覬大有而忌蓋藏其有知道德之遺勤求乎詩書孝慈於其家者復隨在有以扶持而獎勸之庶幾其俗一而不雜人慎刑而易治士亦多美茂易成之材也教化之行風俗之厚吾於是書之成卜之矣

清平縣志序

嗚呼地豈不以人重哉黔一荒服耳自有尹珍北學於中國聿豁蒙翳而耀光明至明而清平孫文恭公出直接洙泗濂洛之傳一時名德鉅公爭相引重黔遂居然鄉魯矣今彭大令清平縣志之修獨於公之生平載之特詳毋亦謂非公不足以重斯邑乎余受而讀之竊見公之服官則有實政以裨國是居鄉則有懿德以懷人心而其論學各條詣淡而識正體大而用宏又皆布帛菽粟之言人人可跂而及茲豈獨足重清平實爲黔省重抑豈獨足重黔省實爲天下重向使清平無公縣志

且寥寥寡色矣。然則大令之所以爲地方計者，其可不
於人才加之意哉？邑士民之所以爲人心風俗計者，其
可不於正學加之意哉？誠能志文恭公之所志，學文恭
公之所學，則斯志之修爲不虛。吾道且重有賴矣。庸僅
一邑一省之幸而已乎。

玉屏蠶書序

黔古要荒地也。草衣卉服，相沿舊矣。士夫之家，亦欲被錦繡，計安吉而地不種桑，商販又以僻遠不時至，至亦昂其值，嗟我窮氓，安所得衣？余以道光丙申秋宣撫茲土，思所以燠吾民者，慶鍾齋方伯出蠶桑簡編，請頒發各屬。越三載，玉屏王大令蠶事成，且著書繪圖，冀以利一邑者，利全省於庠，可謂勤民矣。乃者遵義正安之橡繭，陳太守省菴徐吏目階平寶始之。徐，越人也，生長其中，而躬習其事，其出所利便以導民也固宜。陳籍齊魯，橡繭所自出，知之也詳。然猶三往反購種於其鄉，然後

而者乃有
底績大令遼人夙未諳蠶桑之利乃心求載切指畫綦
詳又請於余檄陳主簿毓書襄其事衣被蓋有賴焉時
任薌圃觀察方集貲遴員赴荆豫閒購棉子試栽於省
垣之隙地并轍給民間又種桑秧數千株聽民移植而
大令之書適成母亦黔中大利將興故長若屬之精神
意氣潛孚默召相助爲理邪各守令皆有字民之責者
觀於是書能無倡率而興起乎若其時近而利遠費省
而獲多書詳之矣

孝經輯注序

孝順德也。天地之仁氣也。聖人序易乾卽繼之以坤。坤者順也。承天而時行。亙古無不順也。而人道準此矣。民之初生。皆以氣化。天卽親也。順天卽順親也。逮乎形化以後。人遂各親其親。而原其始。則雖亶歷億萬千年。人之於天。猶一氣之相承也。周公極本窮源。創爲嚴父配天之禮。而我夫子之對哀公。亦曰。仁人之事親也如事天。事天如事親。天與親本無可分也。知其無可分。則凡天之所生。皆在吾胞與之中。聖人孝治天下。第因而順之耳。三代以降。教養失而人道薄。不惟人與天遠。人且

日與人遠本原一滴遂乃相戕相害莫之或恤而天地
氣化亦爲所淆雜不能復還淳古之初於是戾氣相感
世變日滋至於春秋而亂臣賊子之禍極矣顧其天性
之愛之得於最初者雖極剝喪之餘今猶古也聖人欲
已天下萬世之亂既作春秋以明大法矣然法者治之
具而性則其所以治之本也本治則亂源自塞而餘可
不勞而理此孝經所由作歟夫孝根於愛形乎順而一
主乎敬者也篇中垂訓再三無非履薄臨深之意而總
之曰禮者敬而已矣不敬則不能順也順不從敬出則
第順於其外而不能極諸形聲視聽之微亦第以順爲

順而不能一揆於道成其身以成親夫敬者健德也天地之義氣而實無非天地之仁氣也順而健則乾坤合德上下與天地同流推而放諸四海而準此無體之禮無聲之樂而中和位育之極功也曾子問一篇窮禮之變正以完孝之常以敬行順而紀綱有與立治教有與施先王有至德要道以順天下者此之謂也於虞茲其爲萬世久安長治之本歟是篇章段爲明黃忠端公所更定見於發揮者詳矣長齡爲之輯注寄商粵西黃太史春庭太史以其便於肄誦也遂付剞劂屬爲之序爰述聖人作經之大指而郵請是正焉

重刻禮記精義彙鈔序

聖人雅言詩書執禮執之云者習其器以求其義循乎物以協乎則卽學卽事德業兼焉學者始基莫善於此余子詒令初入塾卽授此經良欲其有所執持他日庶乎其能立耳而善本難得未卒業而已屢易其書矣蓋自明代分經取士禮經專用陳澔集說沿習至今學者弗心鑒也鄭康成最精三禮之學是經注疏儒者多稱之我

朝

列聖相承建中制禮

欽定義疏八十卷薈萃折衷凡鄭疏中之粹言精義罔
弗別擇而融液之洋洋美德乎誠肄禮者之圭臬也而
卷帙繁重窮鄉寒素之子苦於力不能購購亦難致粵
西龍川陸氏覃思著述研精搜微既遵

欽定傳說彙纂

欽定義疏爲詩書儀禮精義彙鈔以惠學者詩書兩經
余已爲之刊行黔人士幾於家有其書矣茲又得其禮
記精義彙鈔而向所歉然於陳氏集說者今乃有以大
愜乎學者之心龍川又以記之篇次凌雜不便肄誦也
於是本朱子之意擬爲讀經次序稍易其舊而仍以曲

禮冠於篇夫禮者天地之序也記禮之書而可無序乎
昔望溪方氏嘗析此經之可疑者條舉而件繫之慨然
於古書之蘊非一士之智一代之學所能盡然則龍川
之編次而彙鈔之也其容已乎貴陽漕帥朱君蔭堂大
令周君石藩謂是書便於家塾之講貫出資授梓李生
佩琳欣然助之余喜此經之得善本可資流播也爲敘
其緣起而首揭聖人雅言之義於篇端使讀者不徒習
其辭通其解而必躬執其事以庶幾於有立焉是則諸
君子嘉惠桑梓之盛心而亦涖斯土者之惓惓龍川以
廣文截取知縣今官湖北之松滋道光甲辰四月旣望

重刻望溪先生左傳義法舉要序

文章小技耳。然而操之有其要焉。達之有其序焉。要則簡而能操繁亦簡也。序則順而能達逆亦順也。易繫曰。言天下之至賾而不可惡也。操之有要也。言天下之至動而不可亂也。達之有序也。如春秋時晉及秦楚之四戰與夫齊無知之亂宋之盟。其事極繁夥矣。一經左氏之鎔冶而堆垛悉化爲煙雲。顧其匠心獨運處數千年來鮮有能拔發者。自望溪方氏爲之批導。則操之至簡而達之皆順。豈第求之文焉爾乎。亦澄其心以晰其理而已。審乎此天下尙有紛而難紀者哉。以之求道而道

貫於一矣以之治事而事得其理矣士方藏器待用文
其末焉耳得是編之意而默運之雖極之身心家國之
蕃變無不循其則而會其通是亦所以精義而致用也
於爲文乎何有

重刻望溪先生家訓序

語有之以父母之心爲心天下無不和之兄弟以祖宗之心爲心天下無不睦之宗族以天地之心爲心天下無不愛之民物誠哉是言也兄弟一體而分形者也自父母視之仍一體也宗族一本而分支者也自祖宗視之仍一本也民物一氣而殊類者也自天地視之仍一氣也循其源而求之則分者可合沿其流而迷焉則厚者亦薄矣今且無論民物之廣遠也近而一族焉其能相收相卹而無恫於其先者百不二三見也再近而一家焉其能相愛相讓而無怫於其親者十木二三見也

豈果忍而出此哉有我自私之見汨之耳私則隘隘則
競競則悖悖則傷傷則紛且亂其極也舉天下之大而
皆囂然喪其樂生之心君人者將何恃以興立國哉於
庠此望溪先生之所爲諄諄致悲於其家者蓋不勝愀
然憂患之思遂不禁言之長而詞之複也夫其割闔帷
之私篤本根之庇黜利而崇義導和而弭爭此亦人人
意中見謂當然者何以隨俗習非羣然不一省也乃若
祭而無齋之無以接乎其先也喪未終而復寢之忍焉
忌哀也此則人心本原厚薄所由分惟願二三君子兢
兢奉持藉以維繫天理民彝於勿墜而舉世味焉禮俗

何由而厚乎至其推明先王緣情制禮之微意謂使中人皆可行而賢者當知所自厚尤於名教重有關係如子路之弗除姊喪雖未見許於聖人而吾寡兄弟而弗忍之一言其意要可以篤人紀風末俗我輩今日正當勉師其意用相敦率庶斯人猶有所觀感而猥自寬假甘與眾人同其薄甚或挂名儒籍而考其質行曾鄉農樸愿者之弗如誦先生是書得無有內顧而動形缺憾慙然不自克者乎書凡十數則先生持以申戒於其家耳而其義則通乎天下矣於處人各和其家天下有弗和者乎人各睦其族天下有弗睦者乎不失祖若父之

心卽無失乎天地之心盡人而能爲也隨時而可勉也
太和元氣庸獨在成周宇宙間哉有心世教者其共念
諸

重刻四書說約序

古無所謂讀書講學也各事其事以卽乎心之所安而已皋陶曰亦言其人有德乃言曰載采采蓋其時無性命之說惟行事而得其心之所安斯謂之德故稱其德必指事以實之未有離事言心者也古者君卽爲師朝野一體其名則民也其實皆弟子也而其所以爲教不過使之自力於農桑樹畜以遂其生孝友睦婣任卹以厚其俗故其時道一風同無文字之繁而奸僞不生無他岐之惑而心志自靜人人遊於道之中而忘乎其爲道猶魚之在水而忘乎其爲水也逮周之衰君失其道

舉世貿貿焉莫知所從天懼斯道之遂泯而人將失其所以爲人也於是篤生孔子以爲人極而君師之統分矣何者君以政教者也事從政出君所職之政皆民所自力之事政統於一故異學無自而萌事麗於實故空言不得而託師以言教者也言從事出聖人不得已而有言皆人生一日不可缺之事然而身不任其事則言之而不能行政不於此出又無以禁人之異言自春秋時各家之說已不勝其紛紛矣此世道一大升降也然自孔子刪定六經羣言盡息數千年來一遵吾夫子之教而莫之敢異者則以言必指夫事事必軌於道道必

本夫天雖一時未之能行而有王者起必來取法是天
意所畱以繫萬古之綱常者歷觀前世其一時政事風
俗有合於吾夫子之所言則其國必興合之多則盛合
之少則衰雖極昏亂之世而但有一二端之合則其國
猶不遽亡是以政教者在一時而以言教者在萬世也
天不能常生堯舜文武而特生一孔子以明堯舜文武
之道於萬世是堯舜文武常接踵於天下也讀書講學
之功豈不遠且大哉四子書聖人之言之精者也實則
人人心中之所欲言而人人不能言聖人言之而人人
仍莫之喻蓋自有宋諸大儒講明以後陵夷迄於明世

而學益多歧矣。於是忠節鹿先生慨然興曰：嗚呼！是失其本心也。離心言事，則無體；是形名法術之流弊也。離事言心，則無用；是清淨寂滅之餘毒也。豈聖人立言之本意哉？於是以書證心。凡書中所言之事，皆吾心中所有之理也；以心證事。凡心之所不安，皆事之所不順也。於是返而證之。此心凡書中之所已言者，循之而行，則理得事順；而於心無弗安也。卽凡書中之所未言者，而借此事以例他事，就一理以衡眾理，順之則心安，反是則未有能安焉者也。而後知聖人之書，乃天理民彝之記載，字字句句無不可見聖人之心。聖人之心無事之

不體卽天地之心也。天地之心無物之不善。卽人人之心也。湖厥由來。卽以見在。卽事。卽心。卽道。約莫約於此矣。而實無所不有。取之左右。逢其源。且若日見其新。溥博淵泉。而時出此聖門一貫之旨也。質諸前後聖而無不合。放之南北海而無不準。此心同此理同也。特藉先生一申之耳。此天意也。或乃高視聖人而卑視己身。夫不觀先生之爲人乎。讀其書而不識其人。又安識聖人。則雖窮年誦習。亦書自書。我自我耳。其不爲天之所棄者幾希。

重刻課士直解序

太史公有言余讀功令至於廣厲學官之路未嘗不廢書而歎也嗟乎詩書豈爲利祿設哉當是時武帝允董江都之對興學養士詔列侯郡守歲貢二人諸不枉六藝之科孔子之術者皆絕其道勿使併進蓋六經四子書取士之制權輿於此矣而首以儒術白衣取三公封侯顧出於曲學阿世之公孫宏其後蔡義韋賢匡衡張禹孔光之徒咸以儒宗居宰相位而禹爲帝者師乃采齊論章句雜入魯論中學者翕然宗之至有欲爲論念張文之諺是豈勸學設科之初意乎隋唐以降詞章盛

而義理微然如韓文公之顏子不貳過論程正公之顏子所好何學論皆出於場屋之作微言大義昭揭日星聖學之傳賴以不墜則亦視乎治經者之所嚮爲何如而得謂所以取之者之未善哉我

朝取士衷明制初場必試四子書義自

仁廟表章朱子纂輯全書頒行學校於是治四子書者咸得所宗而又嚴之以法程限之以篇幅察其離合分寸於神吻微眇之間豈徒爲是束縛哉蓋以收其心使不敢放方能磨礪入細以爲明理治事之資斂其才使不敢騁方能謹恪自持以爲奉公守法之本二百年來

人才輩出上焉者從祀

廟廷顏顏先哲矣次亦宣力中外各能以善及人乃至一經終老亦皆有以自見於世不與庸碌同腐

大聖人曲成天下之材以其釐天下之事者微權妙用莫大於是近乃稍稍異於往時處或患苦鄉閭出或不免喪其所守甚且憤不事事而淺見者輒以病儒效之闊疏豈其然乎母亦正學不晦師道不立視經訓爲空言飾文詞以干進於是歧我與書而二之雖終日讀書於我無與也歧事與理而二之雖侈口談理於事無與也於是而人已不相貫一家已若隔膜仕學不相資入

官遂同牆面坐使經義塵封人心榛塞吏治不良民生
重困

國家徒有養士之費而卒罕收得士之效是非吾儒之
責而誰責歟桂林陳文恭公課士直解一書闡繹精渙
指示親切讀書非徒記誦舉業胥徵實學會人我於一
源貫事理於一致要其牖世苦心總欲爲

廟堂得真才爲海寓厚風俗胥一世而躋之三代之隆
而豈第治經者之主臬已哉使者資性庸下學焉而迷
其源於公無能爲役而是書之旨則亦粗有所窺爰本
公意刻之以詔多士俾知四子書之裨益身心而有資

於世用者如其大而非徒聲悅之爲工由是俛焉自
力切而求之默而識之則必有以洗其心於至靜之中
而無幾不研致其力於至實之地而無事不練淡造自
得溢而爲文一時拜獻之資卽終身踐言之據於以稱
塞

朝廷取士之意並以闡執以儒相詬病者之口庶經義
不終晦昧而儒者事功果有根柢之可據則是書也不
爲虛刻使者方與多士共勸之而深懼其弗逮也多士
其毋忽余言

重刻澗叟存愚序

制義代聖賢立言四子書義蘊閎深自一話一言皆有
至性存焉其或因事而發或因人而施而言近旨遠中
邊俱徹旁推交通左右具宜非若後世著書家見有所
偏論有所局宜於此而不能通於彼效於前而無以善
其後也苟非息心靜氣身入其中參觀古今之事變靜
驗身世之推移熟察氣化之往來究極情僞之微曖則
無以觀其會通而周於倫物鮮不迷謬於書理匪直無
所發明而已立侯先生承文貞公家學微言大義自其
趨庭時已飫於耳而鑒於心故其視學浙中也每出一

顯必將虛神實理層次脈絡批卻導竅句梳而字櫛之
而於聖學源流無不脗合非徒欲善其文而已立言之
道固應爾也夫立言猶不可苟況於立身乎諸士誠能
因文見道則卽以是爲講學之書可也時方刻陳文恭
公課士直解因併附刊於後云

五官職掌論序

人未有無職者不必官也。記曰：人者天地之心，誠以人能事天地之事故。天地之生人，亦不容以已。茲所謂心也。一日廢事，卽爲曠天職而失其所以爲心。臣事君之事，則亦君之心也。故君不可一日而無臣。天下猶一身也。君以天下事分屬之臣，猶心之運乎一身也。有一職之不舉，則一方不治；一方不治，則天下不可得而治。心之運乎一身也，有一體之不周，則不仁；一體不仁，則一身不安矣。人不忍一身之不安，獨不恤天下之危乎？亦大非君之心矣。此吾友唐鏡海侍御五官職掌論所由

作也。於庠今之官猶古之官也。今之臣何遽不若古之臣也。才力不可強。己心獨不可自盡乎。君以臣爲心矣。臣忍自昧其心乎。又況心之所至。智勇生焉。雖愚者可。剛懦者可。振也。心之所激。忠義形焉。雖頑者可。廉薄者可。敦也。心一日不可昧。卽職掌不可一日曠。是乃天地之心。之所以常存。而君臣之義。之所以不廢也。獨居官也。歟哉。

眞西山讀書記節鈔序

學以治性也。性至正而明達其偏且暗者。氣爲之耳。氣動而性汨矣。正路當前而或歧焉。於是有流於一偏而不知返者矣。理本易曉而或昧焉。於是有日入於迷而不自覺者矣。要皆不思故耳。夫思所以盡心而知性也。能思則心平。心平則氣馴。氣馴則理明。理明則處之當。雖以之酬酢萬變。役使羣衆不難也。是故古之君子無事則誠之於思。以養吾氣而非冥寂也。冥寂則無所爲養矣。遇事則慎用其思。以持吾氣而非強遏也。強遏則有時不及持矣。孟子言先立乎其大者。而曰思則得之。

不思則不得也。然則致思於本原之地，尤澄定心氣之要也哉。余苦爲氣所役，往往失其本性。平時旣乏存養，臨事又鮮執持，纔發輒悔，旋復蹈之，皆不思之過也。心齋司馬以節鈔真西山讀書記見示，所錄大抵主於治性，意其爲學，蓋反已澄思而不役於氣者。喜其足以箴余病也。旣錄副藏之，輒書其意以復心齋。吁，號爲學人而不能自治其性，將何以治人。今學已晚矣，猶願與心齋共勉之。

金石索序

余官江右時卽聞馮君集軒令滋陽有善政及來兗州
益審其詳暇乃叩其所學則曰某之學受於某兄寔海
某兄生平無他好獨嗜金石文字若性命竭數十年心
力搜羅考校得金索六卷石索六卷至今猶昕夕以之
也窺其意若甚得者然翌日寔海來言之尤娓娓且曰
吾每夜料量諸事畢必爇燭手校不見跋不止也蓋其
所得者深矣夫爲其事而無所得者其入之也必不深
卽其傳之也必不永今馮君兄弟之所得如是其必有
以永傳乎抑願亭林先生有言金石碑刻可以考校經

史譌誤蓋其傳常千百年多古文字所賴有心者收拾
之尤賴有識者辨正之也經史之學榛蕪久矣然則是
編之作厥功不其偉與

求可堂兩世遺書序

道光己亥嘉定伊臣廖君以史官出守鎮遠是秋余監臨鄉闈而伊臣來襄試事出其會大父南崖先生文鈔及掌教紫陽書院時所撰題解請序於余余受而讀之蓋樸學也其所持論皆根極理要動關風化而於朱子遺書三禮絕學時輩所置弗講者獨批郤導窾有味乎其言之猶見

國初諸老謦欬伊臣又言其高祖瀛海先生筮仕吳門爲儀封張清恪湘潭陳恪勤兩鉅公所器識其時噶禮督兩江齟齬兩公幾不測先生亦遂罷職僅餘青錢十

九文幾難存活旋蒙

聖祖特旨昭雪先生自記頗詳蓋今所謂拙宦也既歸鎮遠郵其書示余則見其孤貧力學睦族敦倫可爲居家者法清操惠政約已裕民可爲居官者法所尤難者當權勢薰灼萬眾波靡之時毅然以一官殉之誓與幽蘭同其馨不與腐鼠同其臭方其顛頓困踣豈能逆知異日之獲蒙湔洗其湔洗者

聖主知人之明其不計湔洗與否而一往不顧者志士勞臣自致之節也記中自言生平於天理良心四字刻不敢怠豈不諒哉豈不諒哉明道先生有言某學雖有

所受天理二字實自家體貼出來蓋卽此心之良天然自有之條理人特弗之察耳自孟子以仁義之心釋良心然後人知仁義皆吾之本心仁則有所不忍自吾惻隱之心出之而仁不可勝用義則有所不爲自吾羞惡之心出之而義不可勝用其忍而爲者放其良心者也彼沈酣利祿之輩豈遂無幾希之存方其習染未淡亦必有不能自克者耿焉而難釋逮於枯之反覆幾若習爲固然恬不知怪然試一爲提醒則天理良心之炯然者未嘗不軒豁呈露絲毫不能自揜卒無如其旋明而旋昧何也若瀛海先生則豈非一率夫天理良心之本

然而世顧笑其拙也。雖然與其有合於其上孰若無咈於其民。與其有樂於其身孰若無歉於其心。南崖先生之以樸學教人蓋亦善承瀛海先生之志。雖出處不必一轍而教之與政無殊旨也。於虐樸拙之爲世詬也久矣。伊臣但能一洗俗腸則天理良心發見昭著無時不流行於日用事物之間。雖欲不爲樸拙也得乎。如是則庶幾其無忝者歟。伊臣故閩之永定人。自瀛海先生官於吳南崖先生又司教其地遂家焉。故今籍嘉定云。

宮傳誠村楊侯自編年譜序

宮傳誠村楊侯天下奇男子也。其才奇其遇奇。遇而不遇而終乃大遇。則益奇才以勇而不僅一勇。將才以智而不僅一智。將智勇皆不得而名則尤奇。然而天非以奇才私侯也。又非以奇遇徒富貴侯也。有奇變斯有奇才。有奇才斯有奇遇。有奇遇斯有奇功。蓋觀於侯之自編年譜而天運乘除往復之數。人事虧盈倚伏之幾。

國家功德之醲厚。威略之宏遠。與夫文武臣工之效命。中外民氣之固結。所以鞏億萬年太平無疆之祚者。胥

於是乎見焉我

朝自開國以來

聖

聖相承仁漸義摩寰海禔福至於

純皇臨御六十年同符

聖祖文謨武烈邕垓泝埏蓋寓縣殷阜極矣物眾地大
遂有乙卯黔楚苗變之事侯乃投筆從戎隻身探虎穴
時年未壯也而已計安桑梓手翦鯨鯢未幾而白蓮教
匪又起始也萌孽於楚既乃蔓延秦蜀聚眾至逾百萬
頭目無慮數十輩幾與漢之黃巾唐之黃巢明之流寇

等而皆以次削平不與前代同其禍則廟謨制勝師武臣克殫其力也當是時睿廟方親政銳意滅賊督責諸將帥

嚴旨一日數下徵兵飛輓徧海內主兵者爲經略額侯而忠武楊侯爲之翼侯於征苗時已重爲兩侯所器至是出奇淩勝謀戰罔不資之遂由偏裨躋專閫以余所聞兩侯沈毅雄勁殆天生戡亂才而侯意思安閒智略輻輳天實生以爲兩侯副今觀譜中所紀戰功最著者如兩面設伏前後夾擊則有黃土場之戰以少勝眾則有小廟口之戰縱而後擒則有遂風寨之戰取勢則有

石笋河之戰兜擊則有人頭堰之戰備預則有大安漕之戰百里趨利并力收功則有雲台鋪之戰卽倉卒臨敵如平井鋪庫谷口之戰亦布置嚴密無寸隙兩侯之力何莫非侯之力而首尾十載危苦萬狀中間額侯以稽遲落帥權又馭下過嚴厲諸將紛紛引避而侯與忠武獨心識其苦忠謂平賊必斯人相與擁持不肯去訖以成功然則侯蓋有大過人者而豈徒敢戰深入臨危制變之足多也哉抑余又聞之賊始起特烏合巨逮其轉戰積年機變百出遂爲勁敵額侯乃堅壁清野以餒之又日夜窮追不使稍憩賊乃技窮至遁入南山則皆

百戰而僅存者尤爲精悍而搜捕餘匪侯獨以身當之
瀕歿者數矣猶疊被

嚴綸僅乃蕝事於庠何其難也迨夫甯陝新兵之變侯
以單騎入萬賊中陽開陰闔倏弭忽驚侯亦岌岌莫必
其命終賴夙昔威惠入人之深不折寸筆俯首就絡而
中於讒口萬里荷戈危疑震撼之交絕無幾微見於顏
面此其所養又何如哉卒以忠悃上孚積勞莫掩特邀
帝鑒游復崇階於是又有滑臺之捷南山之捷

今上六年逆回張格爾盜邊張故霍集占逆裔也久蓄
驟逞邊塵四驚時候駐節固原而忠武督陝甘聞警竝

馳直度大漠三戰三捷遂復喀城收和闐廓清諸部而張逆逸界外不可軌蹟侯乃設間誘之來七年除夕追至鐵蓋山竟俘以歸捷奏入

帝曰都哉天畀朕良將予其大賚汝於是列爵通侯晉銜宮傳圖形

製贊

錫宴

賜詩蔭子延世之榮玉馬袞黼之賁

寵光赫奕焜耀無前而侯年已六十矣當其投筆從戎時豈意及此惟才奇故遇奇功更奇然而侯不自謂奇

也。侯至性。天植敦篤。倫紀尤拳拳於師友。年譜之作。蓋爲兩侯紀勞績。垂示方來。使知累代所不能定者。兩侯克定之。非以自鳴功伐。而於末弁下卒之有寸庸片技者。雖微不遺。至爲主將孫都司挺身代歿。又爲忠武請復翼長。義氣激勃。抗辭不撓。尤其犖犖大者。侯嘗言我本不才。天以我心癡耐苦。置之多事之區。俾了此劫。天爲蒼生不爲才也。是其篤於誼而厚於仁。蓋所性得之。故運之以智而無智名。達之以勇而無勇名。用能出入。歿生夷險一節爲。

兩朝建不世之勳。侯卽不自奇。天下則競奇之矣。而又

而耄文有

卷二

望

烏乎測之哉於虜茲其所以爲天下奇男子也道光十
有九年八月

鄭夢白中丞畫引紀事序

邀覽前籍士之應運而起爲時樹勛者其智慧半由天授又必歷試諸艱使其事變無不周而思力無不入然後有以閎其用而不窘於所施不經歷練則智慧不定而其爲用也必不精甚者且以僨事試之盤錯不廢然返則貿焉亂矣此無他持之不貞而蓄之者不厚也夢白中丞自少卽以奇慧聞及成進士纔弱冠耳不清秘之儲而出爲縣令如是者十數年人或爲公屈而公之得力實在於此蓋吏疵民病知之稔矣於是由州而府而道而司所至輒多棘手而公處之裕如在兩淮時有揚

州下河疏浚之役至繁劇矣公乃尅日而就大吏驚以爲神聞之水災初到卽平其所區畫若素習然浙之夷患卽家起公旣不辭難又不自功忠孝兩全行所無事乃若兩淮之鹽天下之大利亦天下之大弊也而公析理分肌舉綱張目使積弊莫伏而大利歸公且爲來者式海運之行我

朝百餘年來之創舉也時余藩吳門主發運而公都轉津門運事於是受成注措井井悉有條理余愧弗及余與公同官者三始江右嗣江南又旣而滇中蓋公養母十餘年至是乃出而開府也余抵滇甫旬餘適有永昌

之役不但省事盡倚公以辦而所以計安漢回者無鉅細悉以諮公公亦爲余盡慮盡言動必中肯牘幾盈寸僚友且然況於

君國哉公才大而心細卽滇銅一事頭緒萬端而公於數月中已悉其曲折將局採存積改煎京銅以此之贏補彼之縮人咸稱便惟其持之者貞而畜之者又厚故建議必正而時出不窮其斯爲大智慧人乎而非閱盡天下之變不能幾此公之赴閩也出畫引紀事屬識數語蓋生平出處之大節信友順親治民獲上之大概具是矣茲特舉其犖犖大者筆之簡端時又有事永昌而

不獲公助籌筆餘暇撰爲此篇聊以塞諾公問之且爲
余憂念不置也道光二十有六年四月旣望

涪陵周氏重修族譜序

余以嘉慶戊辰成進士受知於總憲東屏先生先生涪陵望族也越三十餘載余巡撫黔中與先生嗣君執菴觀察爲同官一日觀察出其家譜屬序於余曰周之家於涪也蓋十有四世矣自三世祖銅陵令孝子某始輯爲譜逮十四祖康熙庚午舉人孝子某乃重修之今又百餘年矣大懼宗支之散佚等同氣於路人謹承先志有事於纂修願得一言爲世世子孫勸余受而讀之而益憬然於孝之爲至德要道可以順天下而有餘也孟子曰人人親其親長其長而天下平天下之人不可數

計也而無不本乎祖異其人而未嘗異其族也以祖宗之心爲心天下無不睦之族矣天下之族不可數計也而無不本乎天異其族而未嘗異其人也以天地之心爲心天下無不愛之人矣是則所謂孝也是張子西銘之意也似續之遞衍也猶四時之代嬗也夏承春而爲之子春之所生夏必長之秋承夏而爲之子夏之所長秋必收之冬承秋而爲之子秋之所收冬必藏之故孝者天之經也孝子之所以不匱也君家十四世而兩世以孝子特聞譜於是乎再修卽累代之遺訓緒言亦無不原本於孝此聖人所以順天下而君家以之順一族

至太傳文恭公而族益大源遠者流必長今且方興未艾公劉之詩曰君之宗之言君之賴有宗也自孝衰而宗法不講宗法失而天下日益多事矣然後知親親長長之可以平天下也敬身以念祖則百家皆一族也由祖以溯天則百族皆一本也觀察方將爲

國宣力和輯其人民庸獨私於一族然而篤近舉遠則必自茲始矣母亦敬繹兩世孝子之所以垂裕益宏文恭公之遺澤以竟總憲公未竟之志而勿替引之則譜之修也不虛矣觀察勉乎哉是爲序

梁茝鄰前輩退菴隨筆序

隨筆者隨時見道而筆之欲其勿忘也道不可須臾離無物不有無時不然故子思言道極之三百三千至動而不可亂也至賾而不可惡也非好學深思心知其意則道不遠人而人且自遠之烏在其能見也故曰苟不至德至道不凝焉大畜之象曰君子以多識前言往行以畜其德此隨時見道之實功也隨時識卽隨時畜隨時畜卽隨時凝然而難言之矣必也剛健其力篤實其志又加之日新不已而後其畜也大溫公通鑑自言一生精力盡在是矣成之也艱則其行也遠退菴此書蓋

亦日新不已。積一生之精力以成之。而仕學一貫文武兼資。脩齊治平無弗備焉。則通鑑其經而茲殆其緯也。通鑑紀代以資治。託始威烈。上接春秋。茲編分門垂訓。用便承學之士。斷自有宋迄於

昭代。蓋取近而易徵。且事變相類。於法戒尤宜。太史公所稱可施廊廟者。不其然歟。乃若義正事覈。一洗說部雜家之陋。得其單辭片語。皆可持守。終身尤有合於大畜利貞之旨。允宜不家食吉。上九之象。曰何天之衢。道大行也。是書也。出將胥斯世。斯民而畜之矣。退菴其曷能退。雖然進退者迹也。所以進退者道也。道無往而不

在一菴特其寄焉耳而烏乎圖之

尙節堂圖序

今將舉羣嫠之苦節貞心一一而摹之曲曲而繪之則夫淒風冷雨獨夜寒燈之默默神傷耿耿自矢者雖以朝夕與處之骨肉周親且不堪以共喻而何筆墨之能傳雖然圖北風則寒圖雲漢則熱寒熱豈有蹟之可擬似而覩北風之凜然不啻寒之我襲也覩雲漢之赫然不啻熱之我炙也由其蹟以得其心尙節堂之圖亦若是則已矣夫貞烈之精神金石且可貫天日且可質卽極之陵谷變遷世代更嬗而其志之不可磨滅者卒未嘗不皎然顯著於穹壤之間亦奚藉於圖然而窮閭之

疾苦有司未必盡知也得此以儆於有位則敬寡屬婦
不愀然如聞恤緯之悲乎先世之艱難子孫未必及見
也得此以詔其後人則織影機杼不儼然如聆方績之
訓乎且也誦柏舟之詩仰懷清之臺卽一人一事百世
之下猶低徊流連而不能置而況聚百數十人之冰心
雪魄標映於一堂之中撫孤者若而人奉姑者若而人
一無所爲孑然獨處但求此心之安以庶幾無愧於成
者又若而人而其子若女之抱書就塾壓綫作衣往來
而趨走者又若而人秩如也藹如也茲豈非天地正氣
之所萃至苦而有其至樂者存其爲觀感興起必有百

倍於柏舟懷清之爲烈者斯圖其可無作乎余故樂得而序之

鍾山書院課藝序

伯瑜太史主講鍾山之次年將入都補官爰取年餘課試之文擇其不詭於法而思議筆力可觀者付之剞劂以爲多士程式而問序於余余受而讀之彬彬然質有其文微獨太史善教抑亦見多士之善學也乃多士則若有重不忍太史之將去者余乃進而詔之曰夫學豈不枉我哉古之學者奉一先生之教以終身豈必朝夕與處而無失師指則千里猶同堂也聖及孔子學無常師蓋能自得師則無往非學而濯除舊見以來新意今之隱几者非昔之隱几者也太史茲刻已示之的多士

益亦各志已之鵠乎。大匠能與人以規矩，不能使人巧。其謹持而恪守之，惟多士。其神明而變化之，亦惟多士。昔者齊桓公讀書而輪扁以爲特聖人之糟粕，夫不以神遇，雖典訓何補身心而動與道俱。雖時文豈同小伎。書院建於

憲廟之二年，敦崇實學之

賜額。迄今猶若揭日月，乃文繁而實或撥矣。其不夷諸糟粕者幾希。多士其毋以文視文，而反之於心，必求其有得措之於事，必斷其有用。當其擗管澄思，雖隻語片詞皆將以爲他日持行之左券，則所以宏太史之教而

仰副

國家作人之化者正無涯量斯編特其嚆矢巨質之太史以爲何如也